


特 116

429

穿石遺稿



始



高厚遺

大正丙寅初秋

王餘題



出入
玄微

出
弄
竄




十
月
廿
五

大
正
丙
寅



香山公存小象



柔地攝提格立穠
壽三日

蔣廷大竹温題



特116
429



穿石遺稿序

穿石香山翁爲人謹恪談笑不苟少而明大義志常存
 奉公維新之際從 皇師而轉戰各地屢樹武功凱旋
 之後立志育英誘童啓蒙諄々不倦奉職鄉爨實二十
 余年一鄉翕然嚮學風改俗變於是衆望歸翁更所
 里正即捐教鞭而致力民治居約二年以病辭焉爾
 閑居養老繕書詠詩悠々自適德聲彌隆令名遠馳眞
 有古賢之風也余初識翁在閑居時後無幾而翁得病
 遂入玉樓至唱和僅一再而幽明倏異境痛恨曷勝哉

大推正十
15. 9. 20

丙父

穿石遺稿



於鳥羽、伏見役著者

(據戊辰戰記畫卷)

令嗣益彥君追思之餘欲理翁之生平所樂者而捧其靈併頌故舊乃搜遺稿篋底輯之錄之公餘服勞往々抵鷄鳴有使人感嘆者輯錄既成將上梓徵序余余固非其任然余既慕翁之高風又與益彥君同寮多年知君之衷情熟矣今聞功成情感豈得無不異他乎乃記之以爲序

大正十五年仲夏於二條學舍

荻原忠作識

凡例

- 一先考自少嗜詩公務之餘暇乃吟詠自娛致仕後專耽之遺吟懷矣初師安富國民翁及江馬天江翁晚年質大竹蔣逕翁。
- 一斯編所錄主係晚年之作壯時之遺稿既散佚而今不多傳。
- 一遺稿存者長短數千首先煩父執木村柳崖翁選拔約千首更請大竹翁就其中得七絕二百二十一首悉収之本編。
- 一遺稿舊有大竹翁及詞友諸家之圈點評語然今避煩省之。
- 一斯編不由年次而前後從類別。

一斯編之成所負木村翁極多矣特記以表深謝之意。

大正十五年七月

男益彥誌

穿石遺稿

京都香山曙文德著

新年言志

白眼曾看世上人。況逢七十六年春。井泉一掬清於玉。
欲滌胸中萬斛塵。

元夕留客

窓底夜深爐火紅。蒼顏翁對白頭翁。尋常一樣屠蘇酒。
才酌吟朋味不同。

春雪

韶光未遍隔溪村。春雪欲晴朝旭暄。片々隨風飛委地。
紛々柳絮不留痕。

初春嗟峨途上即目。

白玉皚々岩嶽陰。衣巾乍覺峭寒侵。歸來人說山巔雪，
步々着痕三尺深。

籠鶯

嚴冬氣節雪如花。養得鶯兒也足誇。一曲綿蠻聲轉玉，
春風已到野人家。

對東山殘雪

梅花鏤玉柳含煙。三十六峯春正妍。大字山巔尙留雪，
字形髣髴掛雲邊。

立春枕上

今朝窓底覺春生。福壽草開金色明。旭日三竿人未起，
臥聞筧水解水聲。

田家早梅

早梅一樹傍門斜。雪裡噴香分外嘉。玉骨應嫌市塵澆，
淡然高臥野人家。

瓶梅

羅浮夢覺夜將闌。忽訝清香撲鼻端。應是瓶梅花已發，
手摩睡眼揭燈看。

梅林寒月

梅林花發影婆娑。溪畔侵寒乘醉過。泉水無聲薄水合，
玻璃鏡底月明多。

梅花雜詠

江村寂寞隔紅塵。且伴松筠自有真。雪虐風饑耐辛苦，
百年不改舊精神。

同

翠竹蒼松共作隣。新年每當我家賓。梅花有識應微笑。白髮詩翁是主人。

同

旭日映來光的然。一枝春色占暄妍。瓊姿不許紅塵污。碧水青山別有天。

同

刻玉鏤冰能樣新。星魂月魄即精神。古今詩畫好材料。多是江南一樹春。

梅林春晚

敲詩春曉上書樓。月逗梅林景更幽。可羨鶯兒眠未覺。滿身花影夢羅浮。

櫻

淡雲濃霧是花光。玉頰豐肌勝海棠。月下賞姿應不屑。待他旭日見新粧。

廢寺觀花

石佛如嗤又若嘆。檐傾垣破竹成鄰。李桃花發無人賞。付與鶯兒獨占春。

花影

妖李嬌桃傍水栽。朝陽閃處錦雲堆。魚兒也戀春光好。花影涵邊成隊來。

同

映水春花光欲凝。濃紅純白影層層。恍疑天女乘朝霧。一曲溪潭洗錦綾。

花朝和歌題

春濃東隴與西林。淺紫純紅色漸深。旭日三竿塵未起。
花朝一刻也千金。

春江晴望

幾隻漁舟往又還。春光好在渺茫間。琵琶萬頃明於鏡。
影蘸濃州一角山。

溪頭春雨

雨降雲昇不暫留。鴨頭波暖碧於油。深溪識是桃源近。
幾片落紅浮水流。

春晴雜興

春光九十日將中。花笑鳥鳴雙麓東。把筆朝昏耽韻事。
相尋南北兩鄰翁。

同

仙鶴乘晴舞碧空。養花天氣雪初融。都人多向郊原去。
春在烟霞鬢髩中。

同

春遍東西山嶺巔。溪南溪北柳生烟。忽聞村落兒童噪。
百尺梢頭掛紙鳶。

春宵聞歌

落花風疊畫簾波。臨水樓臺月色多。綺夢難成夜將老。
悄聞一曲雪兒歌。

春宵步月

幽庭曳杖月光鮮。厭踏李桃花影鮮。恍訝嫦娥耽繪事。
墨痕點滴白沙邊。

春日偶成

吟向郊園新綠間。輪蹄無跡境偏閑。櫻雲知是留春色。
一朵模糊山外山。

同

春色雖殘興不窮。朝昏曳杖畫橋東。詩人自笑同蜂蝶。
追逐落花楊柳風。

春日過酒家

丹霞鬢鬢弄微和。奈此晴郊春色何。沽酒人皆見花客。
青帘閃處屐痕多。

春水

池塘草綠有餘芬。楊柳風和春十分。潑刺魚跳波ノ々。
落花片片水生紋。

春晴

翩翩胡蝶帶香飛。雨霽池塘草色肥。細影釵光人若織。
誰能沂上詠而歸。

春夢

春草生邊三徑荒。日高猶入黑甜鄉。林邊時聽綿蠻響。
呼覺南柯夢一場。

春山

把杯獨座倚欄干。吹面東風猶覺寒。比叡山巔去年雪。
玲瓏一白隔霞看。

春夕

月色花光競秀靈。應樓不鎖對林庭。蟠桃夭李宛如畫。
卽是吾家錦繡屏。

春晚

柴門曾絕馬蹄塵。籬下幽階草色勻。昨夜前林風雨甚。落花滿地不留春。

輕暖出廬

輕暖拖筇興莫窮。春光如海雪初融。行吟反覆古人句。吹面不寒楊柳風。

同

日暖風柔寒漸微。女兒爲隊摘芳菲。早梅花落春方半。微醉溪南踏月歸。

山寺尋春

節過初春興有餘。東風吹面柳堪梳。山中方識禪房在。花樹深邊聞木魚。

食蕨有感

春蕨採來香味新。日供厨膳換溪鱗。聖恩普及太平世。不見西山餓死人。

菜花

梅圃桃林籠彩霞。菜園一帶敷金沙。春芳多屬紅兼白。占領純黃是此花。

喜新晴

今曉窓前書卷拋。乘晴曳杖出西郊。竹籬茅屋炊烟外。認得梅花春半梢。

同

江北江南載酒過。翠楊影映醉顏酡。青春最好今朝霽。花影可吟風可哦。

同

花影彩霞光陸離。探將勝地逐蜂兒。村童相見時嘲笑。
老叟拖筇移步遲。

荷錢

含黃漾白暮春時。貼水浮波形太奇。誰向龍神禱多福。
青錢拋在放魚池。

暮春撥悶

行歌流飲隙胸中。花落東山樂事空。從是吾廬適閑臥。
一簾薰徹牡丹風。

同

茶烟禪榻夢魂驚。一掬春愁無限情。小院半局人不到。
落花深處聽殘鶯。

暮春即目

一瓢有酒不憂貧。探勝吟行物外身。山郭禪房多趣味。
落花滿地尙留春。

落花

隨風片片委青苔。蛺蝶追香繞草臺。應是莊生酣睡裡。
落花也入夢魂來。

傷春

千紅萬紫委泥塵。忽見園林景物新。無奈東皇難返驛。
綠陰滿地不留春。

雨中惜春

細雨蕭々滴小溪。嫩苔幽草綠相齊。可惜庭園春色減。
落花狼藉委淤泥。

別花

舉杯敲句別群芳。微醉清吟趣更長。只恐明年遇君日。
老翁雙鬢着秋霜。

落花吟

芳時難免有虧盈。醉蝶狂蜂夢荐驚。詩客不堪春晚節。
惜花情勝待花情。

長慶院觀白藤花

飄風水柱送清香。霑露龍髯放素光。那怪洛西塵外寺。
庭園十畝有仙鄉。

過廢園

園樹蕭々鳥語哀。疎檐壞壁半蒼苔。籬邊門外無人掃。
幽草落花埋徑來。

過古址

荒村一逕獨經過。如此滄桑感觸何。千歲舊都無客吊。
空庭春老落花多。

白牡丹

高潔嬋妖不讓梅。光華帶露殿春開。想應昨夜廣寒宴。
戲向人間投玉杯。

燕子花

華冠翠袖彩光鮮。雨後亭々映碧漣。游泳青蛙有誇色。
紫雲領得水中天。

雨後對新綠

山村雨歇夕陽催。一陳狂風烟霧開。數頃園林綠如染。
龍松鳳竹映窓來。

綠陰讀書

初夏風光似畫圖。老松修竹綠成區。炊經酌史貧堪樂。遮莫世人呼腐儒。

小倉山下聞杜鵑

小倉山下石蹊通。烟霧濛々萬木叢。杜宇聲々何處所。碧雲堆裡血痕紅。

霖雨偶拈

茅檐滴瀝沒吟情。細雨水村濛未晴。却識田家秧事逼。亂蛙聲裡叱牛聲。

霖晴郊見

園林田圃兩相宜。雨罷風清景更奇。茄子葉繁多結果。斜陽影映碧瑠璃。

種樹

培養尤忙梅雨初。前園後圃帶雲鋤。朝昏展讀幽窓下。秦火曾遺種樹書。

雨窓無聊次韻柳崖詞兄

斗酒須傾三日霖。陶然一醉夕陽沈。幽人也發凌雲氣。朗讀孔明梁父吟。

梅天訪大珠院

忽入禪房俗慮清。唯聞松籟與溪聲。杜鵑花發紅於火。白髮銀鬚相映明。

山亭梅雨

黃梅時節促詩情。燕子花開香更清。偏覺山村風趣好。園池依舊聽蛙聲。

梅雨霽

絨氈着微壁生苔。烟雨濛々閉又開。須識梅天期已滿。
迅雷昨夜劈雲來。

梅雨放霽

雨罷園庭綠作團。又看新筍已成竿。遙天雲載輕雷去。
一線朝陽上曲欄。

淺夏山行

繞溪新樹色蒼々。苔蘚如茵帶雨香。堪供詩家好材料。
殘櫻一樹駐春光。

淺夏江村

野岸無人呼渡船。江村雨霽夏初天。翠楊影裡銀魚躍。
罷釣漁翁帶醉眠。

同

柳花如雪逐風飄。十里江村景寂寥。詩叟還營小經濟。
穿池引水養魚苗。

雨後初夏

園庭經雨翠氛清。座覺夏初風景生。滿筵莓苔綠如染。
時聞蛙鼓兩三聲。

螢入書窓

新螢數點過芙蓉。恰是涼宵雨霽初。忽入幽窓光燦爛。
照來案上讀殘書。

夏曉

寥々星斗掛松蘿。嵐氣襲衣驅睡魔。十丈塵埃猶未起。
綠陰深處露珠多。

夏曉即目

淡々曉雲猶未披。青苔幽草露華滋。須知今日放佳霽。
測候樓頭翻白旗。

夏山欲雨

亂峯如染綠成堆。忽見狂風驟雨催。樹葉翩翩鳴萬籟。
烏雲幾簇覆天來。

夏日山居。

夏日山村引興長。圍家老樹帶風香。清泉湛處綠陰滴。
未着衫衣猶覺涼。

夏夜即目

清風吹處拂炎蒸。比叡山巔月已昇。蝙蝠垂楊影相映。
畫圖一幅掛檐稜。

同

雨後山村景太嘉。小池十畝聽鳴蛙。林邊螢火影明滅。
訝見無名夏夜花。

梔子花

梔子花開太淡妝。尖頭六瓣異尋常。梅天雨霽薰風到。
萬綠叢中白玉香。

蜘蛛網

卜晴也是報田翁。機智元知冠百蟲。不用準繩與規矩。
製將銀網掛青空。

水樓待月

清風薄暮拂衣襟。百尺書樓碧水臨。詩興已酣人未去。
欲看新月漾波心。

詠雨

帶風颯々撼坤乾。急韻嘈々如大絃。飛瀑忽懸幽屋外。
跳珠時散小池邊。

苦熱

草枯石鏤水如湯。赫々炎蒸人欲狂。未解快川禪老偈。
心頭滅却火還涼。

田家苦熱

祝融振勢氣彌豪。瘠土生煙無綠毛。萬頃良田盡龜裂。
桔槔空掛樹梢高。

喜雨

沛然驟雨灑柴荆。一掃炎塵心亦清。豈啻青苔呈綠色。
蝸廬翁媪覺蘇生。

雨後追涼

雨晴步々有餘情。數里橫塘踏月行。編傘時遭垂柳觸。
露珠點滴一聲々。

盆蓮

數莖曾植玉盤盂。翠袖冰冠不可汙。花影玲瓏香馥郁。
案頭占得小西湖。

蓮花

抽水亭々帶露華。香葩碧葉淡霞遮。微風一陣朱唇動。
宛似人間解語花。

秋近

淡雲片々逐風過。如此蕭々光景何。籬畔早蟲聲欲濕。
豆花開處露珠多。

火大字

火大字成深碧巖。女兒喧噪畫橋邊。恍疑白帝執朱筆。
紺紙揮來懸半天。

初秋雜詠

青蓮開遍小池邊。星斗入秋光更鮮。坐覺今宵涼欲滴。
銀河影白水中天。

湖上新秋

次韻

白露橫空雲霧收。有人半夜棹扁舟。蘆花如雪月如玉。
占得一番湖上秋。

新秋早起

殘蟾逗影未收光。清曉秋風吹面涼。一霎吹過昨宵雨。
老松修竹色蒼々。

新秋對雨

座看微雨灑青蘿。如此蕭々光景何。却喜溪南溪北地。
晚秋定是蓴花多。

草蟲

唧々啾々音響清。幽人不記百蟲名。金風白露仲秋夕。
籬下窓前相對鳴。

月下敲詩

新月如磨水鏡明。三更敲句倚階楹。嫦娥瞥見應嗤我。
斗酒傾來詩未成。

中秋觀月

氣霽雲消風物新。碧空如拭掛水輪。萬家齊見今宵月。
能解盈虧有幾人。

秋露

蟲聲鶴唳夜沈々。白露漸繁秋正深。滿地蚌珠光燦爛。
庭園一畝價千金。

秋日遊大珠院

鏡容池畔幾株楓。一帶夕陽相映紅。萬里天涵深碧水。
大珠院卽廣寒宮。

登樓感秋

浮雲無影雁成行。蘆荻花殘楓葉黃。眺望閣高愁倍大。
江山萬里着秋光。

秋夜偶成

酣睡難成夢易驚。風吹落葉打柴荆。天高氣爽宵方半。
幾杵鐘聲隔水清。

破屋落葉

老樹亭々繞小軒。無端半夜雨聲繁。果知葉々翻風落。
不見床頭屋漏痕。

山寺觀風

獨木橋邊追晚晴。入門時聽鳥聲清。楓林霜滿秋將老。
粉壁黃紅相映明。

籬菊和歌題

淡粧幽艷出塵寰。秋色多存蕭寂間。緬想當年陶靖節。
東籬採菊見南山。

晚秋謁家君墓

紅葉白雲秋晚時。墓前髣髴拜仙姿。靈魂有識應微笑。
朗讀追懷長短詩。

晚秋謁家君墓家君逝去于此二十五年

匆匆又及晚秋天。夢裡經過廿五年。一事不成頭若霜。
慙顏展墓淚潸然。

新寒

道書一卷以心觀。節入初冬氣味酸。開戶兒童時絕叫。
嚴霜如雪逼人寒。

雪達磨

高潔玲瓏自有真。朝陽影裡坐清晨。雪毳肉塊元無二。
白眼看他色相人。

雪中偶作

水柱垂檐玉作行。凍雲漠々滿山鄉。六花壓竹々橫徑。
無復吟朋訪草堂。

雪中動物圖

雪後園庭曙色開。旭光迸處白皚々。奇禽靈鳥時飛舞。
彩翅錦翎相映來。

雪中觀南天燭

忽訝緋桃侵雪開。又疑赤玉帶冰堆。一莖百果紅於火。
照見翠禽求食來。

寒樵

一領羊裘心潔哉。踏霜侵雪度崔嵬。畢生不解黃金貴。
三束枯松換米來。

竹梢寒禽

窗外風光分外嘉。斜々翠竹着銀沙。一群寒雀時來去。
蹴落梢頭六出花。

園中霜曉

如斯荒苑曉寒何。池上堅冰鏡樣磨。頻見飢禽求食到。
繁霜滿地爪痕多。

朝晴雪

玉屑銀沙埋野清。片雲無影放朝晴。一輪紅日爛相映。
滿目山川分外明。

歲抄示兒

朝昏烏兔去匆匆。一歲宜成一歲功。須識琢磨能玉汝。
由來趙璧在胸中。

虎

貪求弱肉日徘徊。叫怒生風草木摧。百獸聞聲皆畏縮。
老狐獨假汝威來。

犬

吠月隔花兒弄馴。東鄰西舍往來頻。守家知主供驅使。
絕勝獸心人面人。

馬

不願知人伯樂迎。戰場何必競功名。群居幸得免羈絆。
起臥曠原終一生。

牛

文角花蹄帶雨耕。戰時又克作犧牲。田單曾用火牛策。
恢復齊家七十城。

羊

短角輕蹄貪草萊。幽音時發有餘哀。柔毛供服肉供食。
小獸也酬軍國來。

猪

荆棘生邊是寢牀。毛皮經歲帶微黃。直行前進卽君性。不省憂患在後方。

雀

屋角携兒朝夕群。啄殘遺粒日欣々。時成圓滿家庭狀。伴得虛心直節君。

烏

全身純黑貌奇哉。月落群飛曙色催。聞說世間悲喜事。城頭啞々報人來。

鵝舌

日驅燕雀叫幽叢。缺舌聲高氣益雄。弱肉由來是強食。古今人類也相同。

鶴

吸霧喰霞十百年。人間不及鳥中仙。雀鳴燕語誰傾耳。鶴唳一聲聞九天。

雁

天高秋老蕭霜寒。數百雁行雲際看。恍訝嫦娥耽繪事。月前戲畫一條竿。

鴛鴦

雌雄相對有餘歡。宿水双々隨處安。愧我人間靈長界。時々破鏡起波瀾。

蛇

全身淡黑細鱗鮮。兩眼如星光爛然。一見人誰不嫌汝。終生被愛辨財天。

龍

千古聞名未見形。畫圖寫出有神靈。爪牙如劍眼如鏡。喚雨起雲驅迅霆。

盆松

尺大磁盆手自栽。鳳枝龍幹貌奇哉。床頭日受幽人寵。好免霜餐雪虐來。

蘭

綠葉參差傍石根。春風秋露卽天恩。清香吹滿湘江畔。莫是靈均未死魂。

法界坊花扇

曾鑄巨鐘懸法堂。繡襦一領帶餘香。佳人芳志名僧德。鯨吼聲中放佛光。

楮衾

白雲數尺帶風輕。四體蓋來心也清。曾畫蕭々數竿竹。夢中髣髴聽秋聲。

眼鏡

朝昏長伴老書生。玉質玲瓏徹底清。燈下雨窓扶視力。蠅頭蚊脚亦分明。

舞兒公園東宮殿下手植松

曾迎鶴駕白沙邊。手植龍鱗嫩碧鮮。最見凌雲後凋色。表來榮壽幾千年。

移竹

數竿移植碧爲堆。鳳尾琅玕氣快哉。坐愛窓前陰漸暗。一群馴雀占罅來。

焚香

老來朝暮曳筇慵。幾炷沈香烟霧濃。草閣無端風暗入。
壁間髣髴見飛龍。

觀京都農園溫室

乾坤別占野人家。溫室養成功足誇。紅白映來香馥郁。
盛冬開遍夏期花。

讀陶詩

五言銜口玉玲瓏。不用彫花鏤葉工。愛讀悠然見山句。
蓬來仙洞在胸中。

讀出師表

兼備蕭韓智與仁。表中句句總誠真。羸顛劉蹶干戈世。
將相如斯有幾人。

題大原女賣薪圖

賣與市人收米糶。朝昏來往不知貧。束薪壓鬢蠻風狀。
却作無聲詩裡人。

題旭日松竹梅圖

翠袖蒼髯能耐霜。冰心玉骨占春光。今朝相會三君子。
不老門前對太陽。

題寒梅

幽人構屋竹相鄰。坐愛山村風物新。林外無端春色到。
一枝忽綻兩三輪。

題後赤壁圖

月小天高水有聲。虬龍虎豹石蹊橫。若非坡老遊斯地。
天下何傳赤壁名。

題雙清圖

採菊栽梅詩味長。湖山彭澤是仙鄉。誰知二老高清趣。
一片心傳千載香。

題畫松

湖岸老松曾拔群。鬱葱百尺脫塵氛。寫來一幅懸楣上。
恍看蒼龍凌白雲。

題扇風機

尺大圓形羽扇開。電流脉々響奇哉。轉旋不止清風起。
一掃烘爐炎熱來。

江山漁樂

榮辱忘懷寄酒杯。斜陽影裡釣魚回。一竿不換三公貴。
占領江湖風月來。

兼好法師舊蹟

淡烟濃霧是仙鄉。花木亂栽圍草堂。曾有風流高士住。
暮吟朝詠領風光。

飛濤亭

光格帝道受

先皇曾是賜嘉名。一樹老松亭外榮。想見茗筵多雅致。
飛濤聲和煮清泉。

次韻京洛四時雜詠柳崖詞兄節三

銀燭蘭燈薰碧流。絃聲漸絕露華稠。月明如玉涼如水。
匹似廣寒宮裡秋。橋街水亭

同

雨痕沾處碧苔肥。未見橋邊帶曙暉。荷葉無端被風觸。
灑將香露濕吟衣。大谷觀蓮

同

一穗青燈耀四邊。餘光分與五更天。明神知是傳心火。
散作千門萬戶煙。八坂祠除夜祭

清水寺

賽來男女善心披。佛閣聳邊香霧滋。我吊高僧名士跡。
夕陽影裡立多時。

鴨塘晚步分韻得寒

鴨坡數里雨初乾。晚步留筇對翠巒。傍水朱樓燈未點。
山巔已見月團圓。

三宅八幡宮

嬰兒止泣有靈威。遠近相傳傾意祈。神德洋洋不能測。
醫家亦受呪符歸。

宇治扇芝懷古

征旗一舉殪雞豚。宿志難成日月昏。鮮血留痕生碧草。
千秋遺恨吊英魂。

黃蘗山萬福寺

佛教說來終奏功。伽藍建築極奇工。朱明偉業今存否。
不及山僧一梵宮。

春日神苑卽目

白壁丹楹映碧苔。檜杉千古綠崔嵬。寂看神苑畫中趣。
群鹿馴人求食來。

箕面勝景

巨石巍然勢欲摧。昔人此處曳筇回。我來不立嚴牆下。
殊守先賢遺訓來。辰石

同

秋深山麓又山巔。紅葉如燃霏雨鮮。幾丈飛泉影相映。
銀河瀉下錦雲天。

瀑布

遊石山寺

水色山光冠一鄉。柴姬遺蹟有餘芳。嬌桃夭李忽凋落。
黃絹詞華千古香。

江州途上口占

寒林日暮斷猿哀。漠々烟雲鬱不開。知是比良山麓近。
霏々雪灑笠檐來。

過關原

萬籟如聞軍馬聲。英雄此地決輸贏。陣營歷々踪猶在。
馮吊不堪懷古情。

拜熱田神宮

晃々靈威不可侵。老松古檜綠森々。巍然殿舍祭神
劍。惹起行人崇敬心。

三保松原羽衣遺趾

翠松老在白沙邊。謠曲唱來今古傳。天女杳然何處去。
彩霞留見錦衣鮮。

鶴立澤

遺蹟寥々安在哉。追懷高士曳筇回。一篇吟咏無窮味。
膾炙古今人口來。

宿諏訪湖畔

群峯起伏逸樓聳。遙秀芙蓉一朵山。影涵平湖明鏡裡。
溫容恰見美人顏。

過川中島古戰場

古戰場中停杖觀。晚秋荒景夕陽殘。劍光扇影今安在。
颯々風悲犀水寒。

次韻柳崖詞兄過檀浦

潮勢如雷雲霧昏。當年驅敵到長門。千事萬馬杳無跡。
空吊介蟲平氏魂。

田原坂懷古

一敗英雄心事空。拔刀壯士氣如虹。緋桃今日花開遍。
留見當年戰血紅。

謁和氣清麻呂公墳墓

古碣崔嵬生碧苔。墓前欲去幾低回。當年神托丹誠
語。忽破妖僧豪膽來。

謁村上義光公祠

勤王思想四方傳。村氏當年先着鞭。奪取錦旗驚賊膽。
姓名長耀極東天。

謁伊藤仁齋先生墓

仁德須知列聖班。當年風靡士林間。荒墳三尺無人吊。
紅葉白雲秋滿山。

謁貝原益軒先生墓

一篇大學萬金書。繡口錦腸爲訓謨。豈啻文人仰高德。
兒童走卒慕醇儒。

謁西鄉南洲翁墓

尊王愛國廢雄藩。蹉跎曝屍何足論。功績長傳千歲後。
清香一炷吊英魂。

江阜玩遊

烟樹蒼々畫不成。江村薄暮雨初晴。前流應有魚兒上。
一笠一蓑携網行。

過廢園

老屋傾斜荆棘間。細流穿石響潺潺。村童不識興衰事。
日入門庭築假山。

清少納言

才媛馳譽國詞林。揭箔風流傳至今。記得香爐峯雪句。
仰欽一片奉君心。

小松內府

率兵臨戰氣如霓。平族須看混玉泥。若使斯公長在世。
白旗何得耀關西。

平敦盛

城閣登臨淚濕襟。楚歌四面夜方深。一枝玉笛斷腸曲。
吹起騷人友愛心。

西行法師

流水行雲脫俗塵。樂文談武養心神。銀猫一擲無他意。
聊諷弟兄爭利人。

楠正行公

用兵謀敵恰如神。王事勤勞終致身。終世服膺慈母
訓。果知孝子是忠臣。

足利義滿

豪奢倨傲極尊榮。不識君臣分已明。漫向明朝受冠服。
擬稱日本國王名。

芭蕉翁
十七言詩獨占魁。寸珠片璧見奇才。青蛙投水古池句。
贈炙萬千人口來。

青木昆陽

學德儒風冠一鄉。修經不敢事詞章。此翁夙識厚生急。
善教甘藷培養方。

華盛頓

會折家君最愛櫻。膝前謝過表衷情。共和獨立他年戰。
一片丹心百萬兵。

漢高祖

天授須知將。方。龍顏隆準貌奇哉。覆秦殲楚無他策。
能用良弓走狗來。

諸葛孔明

才兼文武古今空。剩有溫良君子風。四百余州形勝地。
三分已定草廬中。

陶淵明

田園歸去掩柴門。曾厭區々束帶煩。採菊見山已知足。
悠然占領小乾坤。

玄宗皇帝

矯得滿朝奢侈風。登庸良相補天功。他年只惜心神亂。
不省狐狼戲禁中。

孫男生記喜

龍歲生兒祥瑞呈。呱呱求乳有餘情。他年窓底寒燈下。
日聽啾唔是此聲。

奉和蔣徑先生周甲自壽自嘲次其原韵

人爵不如天爵尊。就官何必報皇恩。幽居閑適聯珠句。多是移風易俗言。

內海遠藤柴田三君薦事賦奠

往事追懷魂欲消。龕燈影裡篆香飄。三君去歲相尋去。都下文林奈寂寥。

送僧雲遊

大地山河皆汝師。不須臨別問歸期。吟花哦月也修養。詩卽是禪禪是詩。

送玉村書史遊中華民國

楚水吳山景自殊。漫遊到處足清娛。揮將掾大黃倪筆。好寫仙鄉活畫圖。

收家信

家書一片報平安。水國秋深雁語寒。縷縷示來兒女態。羈窓幾度揭燈看。

呈大珠院和尚

心與大珠同一清。詠山吟水俗緣輕。奉持釋氏慈悲教。時向迷川度衆生。

偶感觀孫嬉戲

難識成蚯又作龍。朝昏開卷慕賢蹤。不殊嬉戲魚同隊。放課歸家逐蝶蜂。

兒生年當辰起句故及
韓退之勸學文少長聚戲不殊同隊魚轉句及之

偶感

歐洲擾亂傷龍虎。勇士如雲毛髮豎。仰見日章旗影輝。丙辰大正年正五。

同
燕雀何知鴻鵠志。看山採菊醒還醉。讀書講道送光陰。
俯仰朝昏天地愧。

同

奈斯白髮老衰軀。竹屋將傾三徑蕪。幸有筐中一枝筆。
不憂囊底酒錢無。

雜感

勞働人民屬貯金。服膺塵積造山簷。菜根甘薯常宜飽。
勿習虛榮浮薄心。警告

同

獨立自營心最堅。錙朱射利是先天。富商祕訣君知否。
不重千金重一錢。近江商人

偶成大韻

天李嬌桃錦作屏。前庭後苑霧冥冥。翻々胡蝶一場夢。
丈五日高猶未醒。

述懷

光陰如矢瞬間移。閱了桑滄遇盛時。吟詠慚吾弄閑句。
未成風教一篇詩。

雜感

西走東奔策日新。阿權附熱役心身。頻傳紳士羅縲綬。
渾是紛紛銅臭人。

偶感次韻

世上彝倫亂若絲。今人蔑視孝親家。流風亦及山禽否。
不見寒林反哺鴉。

時事雜感

怨霧疑雲結不開。競強較富互相猜。邊陲暴漢彼何物。惹起全歐爭亂來。

同

疾驅直欲陷堅城。不計地形兼敵情。可憫彈丸硝藥裡。健兒十萬供犧牲。

同

豪奢勤儉係興亡。未必文明歸服裝。纏錦犬猿須指笑。潤身四德有餘光。

偶感

口唱文明心野蠻。行非豚犬即驅駝。錦衣玉食恣私慾。義是鴻毛利泰山。

天盃賜所感

紫雲金闕是蓬萊。普會群臣盛宴開。剩有 聖恩覃率土。天盃齊賜媪翁來。

題慰問袋

家鄉慰問感無窮。品物寄來多異同。畢竟精粗且休說。誠心一片在囊中。

祝戰捷

攻圍青嶋一乾坤。陷落傳來萬歲喧。願對犧牲數千士。百方賞表慰靈魂。

喜壽

洛外蓬萊在此鄉。四圍光景適詩腸。幸重七十七年壽。欲傲蒼松耐雪霜。

失題 病中吟

誰知老叟病餘情。步步拖筇左右傾。又覺近來覃口舌。
片言隻語不分明。

穿石遺稿 終

跋

穿石遺稿為益友香山翁之著翁性寬容好學厚忠孝
遭維新之變奔去公役勞身焦思後專從事育英境遇
與余相似以故意氣投合詩酒往來交久而愈相敬嘗
分韻賦詩翁先着鞭余為殿翁曰巧遲拙速何論輸贏
各言其志耳今閱遺稿不及接其警咳豈得感慨不深
哉遂採筆附一言於卷尾云

大正丙寅歲七月

小谷時中誌

碑文

香山曙諱文德幼名秀太郎俗稱曰主殿曰熊藏又號
穿石號守拙嘉永二年八月十六日生年甫十三出仕
仁和寺宮維新之際屬 征討總督宮麾下從鳥羽伏
見役及會津征討軍任監軍爲錦旗護衛兵長出征約
一年凱旋之後立志育英明治五年初奉職北笠置小
學校句讀教師次轉梅畑小學校後任御室小學校長
在職實二十有五年而致仕更爲村民所推花園村長
越二年以病辭焉爾來閑居養老文墨以娛大正十四

283
356

樂石遺稿

年十月二日病歿年七十七配鈴鹿氏無子養平田氏
益彦爲嗣。

萩原忠作撰

(百册ノ内第 號)

大正十五年九月二十五日印刷
大正十五年十月一日發行
(非賣品)

著者 故香山曙

發行者 香山益彦

京都府葛野郡花園町大字御尋
小字小松野十六番地

印刷者 内外出版株式會社印刷部

代表者 須磨勘兵衛
京都市西洞院七條南

終

